

Oqaluuserisassat pillugit nassuiaat.

(Inatsisartunut sivisunerpaamik ilaasortaasimasoq)

2014-imi Inatsisartut ukiakkut ataatsimiinnissaannut UKA 2014-imut oqaluuserisassatut siunnersuutit siunnersuutillu oqaluuserisassanngortinneqartut 8. september 2014 nassiunneqarput.

Nassiussinerup tamatuma kingorna immikkoortut nutaat marluk ilanngunneqarput:

Immikkoortoq 140: Naalackersuisut Siulittaasuata sulinngiffeqarnissamik qinnuteqaataa.

Immikkoortoq taanna ullumi oqaluuserisassani immikkoortutut kingullertut oqaluuserineqassaaq.

Immikkoortoq 115: Inatsisartut Kukkunersiuinermut Ataatsimiititaliaata Nunatta Karsiata akiligassarsiffittut Naalackersuisunut ilaasortanit atorneqarsimasorinarneranit ilisimatitsinera pillugu apeqquteqaat aallaavigalugu oqallinnissamut siunnersuut kiisalu Inatsisartut pisut pillugit isummernissaannik siunnersuut. (Inuit Ataqaigiit, Demokraatit, Partii Inuit aamma Partii Naleraq siunnersuuteqartuullutik)

Immikkoortoq aqagu pingasunngornermi ulloq 1. oktober nal. 13 oqaluuserineqassaaq. Taamaalilluni aqagu pingasunngorneq immikkut ataatsimiiffiussaaq.

Siunnersuutit ataasiakkaat UPA 2014-imi siullermeerneqareerput UKA 2014-imilu aappasaaniigassanngortinneqarsimallutik. Siulittaasoqarfiup inassutigaa siunnersuutit taakku toqqaannartumik taasissutigisassanngortinneqartassasut, Inatsisartuni oqallinnerup nangeqqinneqarnissaanut immikkut pissutissaqanngikkaangat.

Naalackersuisut Inatsisartunulluunniit ilaasortat qinnuigineqarput immikkoortup pineqartup suliarineqalinnginnerani piffissaalluarallartillugu Siulittaasoqarfimmut saaffiginnissuteqartaqqullugit, siunnersuutip suliareqqinneqarnerani maani inimi oqaluusereqqinneqarnissaa kissaatigineqarpat.

Ullut ataatsimiiffiusut ataasiakkaat ingerlaavartuussapput, taamaalillunilu immikkoortut ullumi ataatsimiiffiusumi oqaluuserineqarfissaminni angumerineqanngitsoortut ullormi ataatsimiiffiusumi tullermi oqaluuserineqartassallutik.

Oqaluuserisassat nalunaarutigineqarnerannut atatillugu Inatsisartunut ilaasortat partiilluunniit

oqaluuserisassanut oqaaseqaatissaqarunik kissaateqarunilluunniit qinnuigineqarsimapput tamatuminnnga ataatsimiinnissaq kingusinnerpaamik sapaatip akunnerannik ataatsimik sioqqullugu Siulittaasoqarfimmut saaffigineqqullugit. Siulittaasoqarfik oqaluuserisassanut uparuaatinik tigusaqarsimanngilaq.

Naggataatigut oqaatigineqassaaq Inatsisartunut ilaasortat ataasiakkaat namminneq akisussaaffigimmassuk siunnersuutimik kalaallisut danskisullu eqqortumik oqaasertalerneqarsimanissaat. Siunnersuutini oqaasertaliussanik erseqqissaasoqarniarpat taakkununnga iluarsisutit siunnersuutip siullermeerneqarnissaa sioqqullugu Allattoqarfimmut nassiateqquneqarput.

Suleriaatsitsinni § 4, imm. 1 naapertorlugu oqaluuserisassanut nassuiaat isumaqatigiinniutigineqarneq ajorpoq, taamaattumillu oqaluuserisassanut nassuiaat pillugu naammagittaalliutit siulittaasoqarfimmut allakkatigut saaffiginnissutigineqartassapput.

Taamaalilluni oqaluuserisassat akuerineqartutut isigineqarput.

Ullumi ataatsimiinneq eqqarsaatigalugu taasisarnerit pillugit isumaqatigiissuteqarput:

Anders Olsen
Naaja Nathanielsen
Nikolaj Jeremiassen